

陶文毅公全集

陶文毅公全集卷九目錄

奏疏

災賑

陳奏湖南山田旱歉情形摺子

會同總督籌議皖省各屬被水事宜摺子

撲捕蝗蝻淨盡附片

備陳災區利害請速堵減壩摺子

收養江北災民並籌議勸捐章程摺子

縷陳辦災積弊摺子

縷陳江蘇辦災章程摺子

體察賑務情形摺子

奏疏

災賑

陳奏湖南山田旱歉情形摺子

奏爲敬陳湖南山田旱歉情形請

旨飭查預防滋生事端事竊湖南一省半山半水濱湖  
之田畏水不畏旱五六月卽可收穫近山之田一  
旱輒槁七八月方收至於深山窮谷地氣較遲全  
賴包<sub>禾</sub>諸芋雜糧爲生九月後方收地形既有高  
低暘雨亦復異宜本年三月以後雨澤稀少雖有  
得雨之處亦未能十分沾足惟濱臨洞庭湖一帶  
隄垵及附近省城之長沙湘陰等縣風稱卑溼俱

獲豐收其餘如澧州慈利桃源安化及寶永所屬  
皆不免花旱歉收而辰沅兩府爲甚辰州府屬之  
沅陵瀘谿沅州府屬之麻陽爲尤甚百姓以草木  
及神仙土充食斗米價錢五六百文不等此時甫  
屆收穫卽已如此將來冬春以後更不知若何昂  
貴伏思湖南山多田少刀耕火種之民終歲勤動  
雖遇有秋之年猶必借助於茶蓼薇蕨最稱艱苦  
濱湖之田遇豐歲尙可有餘但舟航四達般盤者  
多民無蓄聚閒有穀多之家則又貪圖厚價不肯  
零糶以致近處貧民挑負空囊奔走終日而不能

購買升斗有錢無糴年豐而啼飢者比比然也前此嘉慶六年省城一帶偶因荒歉卽有奸民喻次山等乘機劫搶聚衆幾於千百幸彼時卽行捕獲正法未至釀成事變餘如新化縣之蘇溪關益陽縣之桃花江等處每遇荒年多有無賴之民沿江阻守不許米船流通間被搶奪此往事之可懲者也况辰沅所屬逼近苗疆民情浮動尤爲可慮卽臣所居之安化縣亦與辰州接壤嘉慶十二年五月間因值旱乾卽有放火搶物之事如小淹河曲龍塘洞底等處被燒之家甚衆報官不究致有

被燒至兩三次者居民相聚鳴鑼巡守此臣本籍  
見聞較切恐他縣類此者尙多或因山僻路遠民  
隱無由上達竊思我

皇上保赤誠求惟恐一夫不得其所卽如本年直隸之  
大興宛平春收不過二三分而地方官竟報八分  
仰荷

訓飭查明在案此在

輦路所經尙有諱飾何況遠省若偏僻之處卽本省  
上司尙恐耳目難及非各州縣自發天良據實舉  
報先事綢繆則事變之來往往由小致大雖一隅

中之一隅安可不預爲防也應請

敕下該地方官速行出示凡有穀之家於零星糶買不得阻滯其據險遏糶如蘇溪關等處卽行拏辦俾穀米流通仍嚴禁盜賊有倡意劫搶者立卽懲治毋稍寬縱庶不致別生事端而旱歉之民復登衽席矣

臣

有察訪本籍之責旣有所聞理合據實具

奏伏祈

皇上聖明睿鑒謹

奏

嘉慶十九年九月十七日具奏本日奉

諭旨一道交湖南巡撫查辦



會同總督籌議皖省各屬被水事宜摺子

奏爲籌議安徽省各屬被水事宜恭摺覆

奏仰祈

聖鑒事竊照繁昌無爲等各州縣具報被水經

臣陶澍

奏明親往查勘并兩次由驛覆

奏勘辦撫卹情形

臣

孫玉庭亦將皖省沿江州縣被

災各情形附片具

奏在案茲於七月初二日由驛奉到

上諭陶澍奏勘辦被水州縣情形一摺安徽省銅陵無爲繁昌蕪湖當塗五州縣因本年雨水過多加以上游

江水漲發以致圩垸漫溢民田廬舍被淹經該撫親往履勘損傷人口無多業經飭令掩葬居民避居土埂亦經地方官搭蓋篷席散給饘餅窮黎食息有資惟戶鮮蓋藏殊堪憫惻著加恩將被水軍民一體給予撫卹一面飭令各州縣減價平糶俟水勢稍退卽設法疏消淨盡俾得補種秋禾倘一時不能疏消難資耕作卽據實奏請恩施其上游之懷寧桐城東流績溪均報被水著迅速遴員履勘望江潛山二縣並著加恩酌給撫卹至下游各處撫卹如有未敷卽由蕪湖關就近迅速放給再由司庫解還仍飭該管道

府認真查辦核實報銷其續報被水之宣城涇縣青陽貴池等處並著該撫親往挨查奏明辦理毋令一夫失所用副朕乘時布澤至意該部知道欽此又於七月初十日臣陶澍差弁齎回初次原摺一件欽奉

硃批悉心察看妥爲撫卹毋致一夫不獲通行勘明後再行據實奏聞欽此又夾片一件奉

硃批查勘明白一併覆奏欽此又於發銀四千兩星速分解句旁奉

硃批甚好欽此仰見

聖主痾瘝在抱軫卹民依之至意跪讀之下欽感難名  
伏查本年五月內雨水較多近山各處較洪驟發  
濱江州縣圩隄冲破如安慶徽州寧國池州太平  
廬州所屬州縣多被水淹其間太湖宿松歙縣休  
寧黟縣婺源祁門績溪石埭建德旌德寧國太平  
舒城巢縣等處地勢較高間段被水隨即涸退補  
種齊全青陽雖有濱江之處爲地無多惟銅陵無  
爲繁昌蕪湖當塗宣城南陵望江懷寧東流桐城  
貴池等十二州縣被淹最重潛山涇縣水沖亦重  
均經辦理撫卹以濟極苦貧民臣等嚴飭印委各

員毋許稍有浮漏其續報被淹之和州廬江含山等處亦一律平糶倉糧各災民感沐

皇恩無不同聲歡頌惟沿山各處水久消退而濱江州縣因上游江廣諸水勢如建瓴迄今兩月消水不及三尺受淹田畝仍未涸出現交處暑無由補種

臣等察看情形委係災象已成秋收失望各災民

家無蓋藏米糧漸貴平糶倉穀究有不敷且濱江各屬皆係徵解兵米之區短缺兵糈所關匪細若由陸路各屬暫行借撥不特挽運爲難亦且費用甚鉅異日歸還殊多周折

臣

等往返札商惟有採

買米石庶可以安待哺之民心平商販之市價而  
於兵精亦爲簡捷現據藩司徐承恩援照嘉慶十  
九年採買成案具詳前來擬卽於藩庫動項遴委  
幹員前赴四川湖廣江西等省探價購買米十萬  
石其價值如有不敷臣等一面咨明採買省分就  
近動借一俟運回到皖先約計災缺兵糧儘先提  
貯餘卽分運災區減價平糶其動用銀兩若干及  
將來如何歸還庫款統俟事竣後再行核實辦理  
一轉移間於民食兵糧均屬有濟實爲目前第一  
要務再各屬災分輕重須俟水退後方能定準而

蠲緩賑卹勢所必需且圩隄冲破民間多無力修  
築亟須借帑興修俾資保障凡此諸務自應將庫  
貯先爲籌畫茲現據藩司查明安徽藩庫貯存正  
項銀一百三十餘萬兩曾經咨部報撥臣等商酌  
以此項存款自應暫留備用擬卽咨明戶部免致  
撥協他省轉滋往返除俟各屬水退確查被災分  
數另行籲請

恩施外謹合詞將現籌被水事宜先行覆

奏伏乞

皇上聖鑒訓示謹

奏

道光三年八月二十三日奉到

硃批另有旨欽此同日奉到道光三年八月初四日內

閣奉

上諭孫玉庭等奏籌議安徽省各屬被水事宜一摺本年安徽省濱江各州縣被水較重米價漸昂民食兵糈攸關自應預爲籌備著照所請准其援照嘉慶十九年採買成案於安徽藩庫動項委員前赴四川湖廣江西等省採價購買米十萬石如價值不敷卽於採買省分就近動借一俟運回到皖先約計災缺兵



糧儘先提貯餘卽分運災區減價平糶其動用銀兩若干及將來如何歸還庫款統俟事竣後核實辦理至安徽藩庫貯存正項銀一百三十餘萬兩前曾咨部報撥該省將來辦理蠲緩賑卹及借帑興修圩隄諸務需項較多著戶部卽將此項存款暫留皖省備用無庸撥協他省該部知道欽此

撲捕蝗蝻淨盡附片

再皖北鳳潁一帶前因蝻孽間段萌生業將飭屬撲捕情形先後具

奏在案其懷遠鳳陽靈璧三縣交界之處早經捕盡續後靈璧縣接連江蘇睢寧縣之馬山湖內又有蝻生因湖水較深難於撲打經該署令黃光裕雇鴨四千餘隻連日咬食無遺惟宿州接壤徐州府屬之石相閔賢等處有飛蝗入境隨撲隨至臣在省城率屬徐承恩劉斯帽等於

敕建劉猛驅蝗神前虔誠叩禱一面飛飭該道帶同委員

徐湘王澄樊佩恩金鼇等馳赴督捕經廬鳳道戴  
聰率同宿州知州蘇元璐約集民夫三千餘人挨  
處撲打罄盡其時該州之灰古堆地方蝻子最多  
該州蘇元璐分帶民夫馳往但見青蛙無數食蝗  
全盡又有鳥雀數萬在懷遠西界啄蝗一日而盡  
叨荷

聖主福慈

神貺昭然彌深欽凜各鄉民夫咸加踴躍該州因蝗  
已淨盡遂帶同民夫撲入徐屬蕭縣界內不分畛  
域代爲撲捕現在該境官弁兩面合撲計日可淨

諒不致再有飛蝗闌入又蒙城縣之四堡村亳州之譚家集等處與阜陽鳳臺接界處所間有蝻子萌生均經地方各員隨時捐貲收買撲打無遺惟懷遠鳳陽靈璧三縣前此蝻孽初起時勢甚緊急經該道戴聰稟請就近於關務閒款內借銀二千兩分路收買并爲民夫掘坑撲捕之費事竣後已由該道暨府縣均勻賠補查各屬蝗蝻現俱淨盡並未損傷禾稼臣仍飭令該道巡歷各屬確切梭查毋許稍留遺孽所有皖省蝗蝻撲捕淨盡緣由謹附片具

奏仰慰

宸廑謹

奏

道光四年八月十二日奉到

硃批知道了欽此同日奉到閏七月二十六日內閣奉  
上諭陶澍奏撲捕蝗蝻情形據稱在省城率屬虔禱於  
敕建劉猛驅蝗神廟並飛飭委員督捕時宿州等處蝻子  
最多該道督同州縣分帶民夫馳往一日全盡神貺  
昭然覽奏實深欽感朕親書扁額發交該撫敬謹摹  
泐製扁在省城

神廟懸掛以荅

靈佑欽此同日奉到

御書神參秉畀扁額

備陳災區利害請速堵減壩摺子

奏爲備陳災區利害請

旨速堵減壩事竊本年淮揚被水成災減壩開後海州等處尤重其可慮有數端請言其大者百姓顆粒無收終年乏食可慮一也清水太洩明年恐難刷黃可慮二也減壩雖開祇能暫緩目前之急而高堰不堅終非了局可慮三也糧船雖回被災各屬米已蠲緩無漕可運旂下水手謀食仍難可慮四也明年江浙漕船幫次在前自可挽渡但恐江廣船阻又須借黃則河身必又淤墊可慮五也海運

雖經試行可備後策而商船須隔年雇定若臨期  
猝辦則無船可雇可慮六也下河久淤水無去路  
亟須挑挖若視爲緩圖則歲歲偏災所傷實多可  
慮七也東南財賦之地元氣屢耗非三五年所能  
復原民旣困苦官亦賠累虧空由此而起

國用因之而絀可慮八也以上數端臣反復思維不  
勝焦灼皆河務相因而至而數十萬無食之民尤  
關緊要淮揚一帶猶習見水患海州等處則水由  
決放能無怨咨兼其民情獷悍接近東豫梟匪出  
沒之所非大江南北可比昔宋臣蘇軾有言冒法



而爲盜則死畏法而不盜則飢飢斃之與棄市同  
是死亡而賒死之與忍飢禍有遲速此誠洞切利  
害之言伏維

皇上念切如傷凡有偏災無不

恩膏立沛蠲賑兼施動輒鉅萬

聖慈高厚淪浹人心惟

國家之

惠愛無已而經費有常以之養民自不若使民自養現  
在秋收已失冬麥難種若明年再誤春耕實屬力  
有難支應請

敕下督

臣河臣

副河臣

趕於今冬挑河完竣卽速將王

營減壩尅期興堵務於明年正月內趁春水未生  
之前竣工使河流歸舊庶海州沐陽安東各境得  
於二月內涸出趕辦春耕俾資安輯至淮揚所屬  
各壩日內漸次堵築惟淹浸已深刻難涸復將來  
能否種麥俟查賑時察看情形設法安頓以冀災  
黎仰紓

宵旰再督

臣河臣

現辦河務盡心竭力無須

臣

越俎代

籌祗以地方緊要利害相因是以縷細具陳伏乞

皇上聖鑒

賜敕施行謹

奏

道光六年十月二十五日奉到

硃批另有旨欽此並於可慮一也至可慮八也凡八句

均奉

硃點冒死而爲盜則死六句均奉

硃圈以之養民不如使民自養句旁奉

硃批正論欽此同日承准

軍機大臣片寄貴撫具奏前事一摺已奉有寄信

諭旨一道交琦善等速辦矣

收養江北災民並籌議勸捐章程摺子

奏爲籌辦收養江北被水災民並勸捐情形仰祈

聖鑒事竊照江北淮揚各屬被水受淹疊奉

恩綸給予撫卹

臣

等仍率屬捐廉倡濟並將折價緩帶

餘漕分撥災區暫資減糶一俟水退即可確勘災

分籲請

聖恩給賑惟先期避水及驟被沖淹本籍不能存身者  
甚多分赴沿江上下及就食南來經臣飭屬設法  
資送附片奏

聞在案查自八月以後扶老攜幼散赴江寧蘇松常鎮

太倉等屬地方每處各有數百至數千不等此等  
民人流離顛沛餬口維艱若聽其沿門索食既恐  
擾累閭閻而積水未消卽資送亦無家可歸必須  
收留安頓俟水涸時遣令回籍臣與兩司暨道府  
首縣等籌議勸捐並酌定辦法通飭各屬一體收  
養謹將現辦章程敬爲

皇上陳之

一擇棲止以資安集也蘇屬人烟稠密空地無多  
若任災民四散游乞必致填塞衢巷有妨做業  
兼恐滋事查宋臣富弼在青州首以擘畫屋舍

安泊流民滕達道在鄆州城外爲蓆屋以次授地現已仿照其法飭令該地方官於城外多覓寬大廟宇搭篷設廠分別停住以免露宿亦俾散而不流安頓較易

一設籤冊以便稽查也災民旣衆莠良不齊弗容漫無稽查昔撫臣張伯行言流民養濟之法以十人內外立一排頭晝則分路求食夜則仍聚一處俾資約束立意最善現飭各廠責成首董按數查明各繫腰牌給竹籤一枝照驗出入仍照保甲之法每廠設立一冊登載戶名籍貫男

婦大小口數俟資送回籍時併冊移知原籍查辦賑務亦可藉相核對

一散給口糧以資養贍也或煮粥或散米或發錢地方情形互異各視所宜不能一例惟須各屬同時舉行以免羣集一處偏受人滿之患現飭各屬按照地方大小柴米價值災口人數酌量分派留養每日放錢放米或粥按牌給發將來回籍時卽按冊每名併給數日口糧以資路費有願早歸者隨時備文遞送

一分別男女以重廉恥也此次被淹旣重出外圖

食多係良民婦女隨行拋頭露面情形可憫現飭查明凡有眷屬同行者聽在一處不得分置其有婦人攜帶孤幼無長男同行者卽另開居住不許混在男衆之內用昭區別

一施醫藥以拯疾病也民人被水遠來旣受潮溼沾濡又多不服水土易生疾病恐釀時疫現飭各廠選設醫生二名隨時給藥調治以重民命閒有病斃者卽日捐棺斂瘞毋許暴露

一施棉衣以禦寒冷也留養民人旣資餬口若禦寒無具仍難保全蘇屬好義紳士向多捐立善



堂施放棉衣現飭查明各該處如向有善堂者  
勸令預備施放由官酌量添補其未立善堂之  
處卽倡捐募給以免號寒口內各廠報有孕婦  
生育亦卽加給包纏衣物俾資乳養

一禁販賣以杜拐掠也何來偶遇飢荒轉徙民人  
每將攜帶子女價賣與人而奸販掠賣之弊卽  
出其中現飭各屬嚴禁販賣凡就食流民攜帶  
子女過多實難哺養者准其報明交入育嬰堂  
哺養毋許奸徒販賣致收拐掠其自願與民人  
嫁娶並非販賣者應聽其便

一設巡卡以防匪類也災民出死求生原無歹意  
有種棍徒倖災滋事倚恃人衆借端強索搶劫  
隨之法在必懲無可姑息查各處河路向有名  
爲倒撐船者裝載男婦往往晝乞夜偷卽豐歲  
亦所不免此時飢寒之下更恐鼠竊易生亟須  
防範現飭分段設立卡房支更防護務使匪徒  
斂迹就食災民更可相安無事

以上各條經<sub>臣</sub>核定飭屬實力奉行並將章程鈔  
發照辦間有情形不同之處亦聽其參酌而行不  
滋窒礙惟人數旣多時候又人所費不貲<sub>臣</sub>等捐

廉無幾全賴好義紳商共敦善舉查收養流民向  
無獎敘惟本年情形迥非昔比各屬紳士能於外  
境災民不存膜視較之本境捐輸救濟尤爲可嘉  
如有捐數較多者俟事竣查明彙請

旌獎一面出示曉諭以資激勵至現在各災區水勢漸  
退俟上游各壩堵合田廬涸出該民人即可歸還  
原籍自謀生業俾免流移所有臣籌辦收養災民  
並勸捐緣由謹會同督臣琦善縷悉具陳仰慰  
宸廑伏乞

皇上聖鑒謹

奏

道光六年十一月初二日奉到

硃批朕正深厯注覽奏精詳周妥朕心稍慰務要隨時  
妥行督辦勉副朕恫瘝在抱之意有應奏者據實奏  
請可也欽此

縷陳辦災積弊摺子

奏爲縷陳災務積弊及現在飭屬查辦情形仰祈

聖鑒事竊照地方偶被偏災

恩施撫賑全在印委各官嚴絕弊竇俾

帑不虛糜人皆得濟本年淮揚徐海等府州被災較

廣仰蒙

恩旨分別給賑目下正值分查戶口領銀散放之時尤

須力除積弊就

臣

意計所及採訪所知大抵辦賑

之弊凡有數端委員下鄉不知道路或不諳土語

多藉隨行書役而書役每多與鄉保勾結互滋朦

混其弊一也委員夫轎及隨行書役所得飯食不敷或責之鄉保鄉保承應難支或更雇人幫辦則又添食用不免暗地取貲其弊二也各處村莊人稠勢衆委員一到往往捏增口數或縱令婦女喧曉要挾甚至攔舟圍轎故作攪混責懲難加理諭莫遣其弊三也或空屋無人村鄰代稱外出或攜挈婦子自稱遠道歸來紛紛求票卽恐係別保之人攙入難以猝辨其弊四也查賑之期不過半月兼旬其間有村莊遼隔或雨雪阻滯鄉保知其不能久稽故意引向遠處難處以促其期疲其力迨

時日迫促則未到之處仍祇憑鄉保所開給票其  
弊五也鄉保戶口偶錯地方刁棍因挾其短而訛  
索稍不遂意糾黨連控承辦者畏其拖累遂預留  
地步以浮冒爲彌縫之具其弊六也鄉保固多狡  
猾亦有愚民不諳例應賑否概求賑票鄉保駁斥  
輒被毆辱致有鄉保不敢跟查轉聽本境土棍開  
報者其弊七也或災本輕微鄉保土棍斂錢雇倩  
窮老劣衿連名求賑不准則奔控求勘印委各官  
懼以諱災取戾或蹈辦理不善之咎隨亦不能堅  
執其弊八也放賑時不於酌中之地設廠散給以

致道途遼遠老病婦女不能赴領或赴領而口數較少僅敷往返食用或不能赴領而託人兼領被其侵扣其弊九也地方爲富不仁之家乘災民窘迫先給賤值買其賑票一俟放賑卽持賑票雇人包領是暗削脂膏而災民不能言委員不及知其弊十也有此十弊是以辦賑甚難然所以除弊之法有四其一查賑之限宜寬寬則挨查之力舒而不至草率放賑之日宜分分則領賑之人少而不至擁擠其委員又宜假之以權一有阻撓滋擾解赴印官卽行懲處俾知嚴憚自不敢藐玩以滋事



其一委員攜帶書役及跟查之鄉保必須寬給工食使之有力當差如查竣一莊毫無弊混並應量加犒賞稍有弊竇立即重懲斥換俾賞罰分明自不致有勾結欺罔之事其一委員戶必親到口必親點點驗既確然後入冊給票每查竣一莊即將一莊內所有極次貧花名戶口及應領銀數開寫榜示粘貼莊前如有詭戶及舛錯之處許於數日內首告更正則共見共聞自無所施其捏冒之技其一多設賑廠各就四鄉災民之便老弱不難赴領雨雪不虞阻止自不致爲代領者侵扣亦不甘

以賤值而賣其賑票有是四端可除十弊然總以  
得人爲第一要義印委各員得人雖諸弊叢積不  
難掃除否則或先存染指或畏蒞無能本身已不  
可靠遑論其他前經臣與督臣率同藩臬道府及  
州廳以上各員捐廉共湊銀三萬餘兩分撥災區  
作爲辦賑委員及吏役人等食用不敷之費俾得  
安心查辦以清浮冒剋扣之源復將應需賑銀預  
解淮揚府庫俾各州縣於詳定數日時卽就近領  
銀無庸遠赴司庫以歸簡捷並疊札通飭各屬激  
發天良屏除積習拯救災黎現在體察情形尙知

奮勉間有一二未甚得力之員業經藩司張志緒親往周查立即撤換將來各員如果經理得宜自當遵

旨加以鼓勵倘或辦理玩忽仍卽隨時參辦地方刁劣希冀捏冒者現亦訪獲數人懲辦之後均知斂迹  
臣仍將應辦章程分行各屬務期

實惠均沾無濫無遺所有現在飭屬查辦賑務情形謹會同督臣琦善恭摺具

奏仰答

宸廑伏乞

皇上聖鑒謹

奏

道光六年十二月二十日奉到

硃批另有旨欽此同日奉到道光六年十二月初六日

內閣奉

上諭陶澍奏災務積弊及現在查辦情形一摺江蘇省  
淮揚徐海等府州被災較廣現值分查戶口領銀散  
放之時尤須力除積弊如該撫所奏書役與鄉保勾  
結朦混縱令婦女喧撓別保攙入求票刁棍訛索及  
買票雇人包領等十弊均係辦賑所必有該撫論除

弊之法四而要歸於得人自係正本清源之論現經  
該督撫等捐廉三萬餘兩分撥災區作爲辦賑委員  
吏役人等食用之需復將應需賑銀預解淮揚府庫  
俾各州縣就近支領辦理俱極周妥該員等如果經  
理得當自應加以鼓勵倘辦理不善或竟意存染指  
僅予撤回不足示儆卽著該撫摘尤參辦毋稍瞻徇  
其地方刁生劣監希冀捏冒者亦著訪拏究懲欽此

縷陳江蘇辦災章程摺子

奏爲縷陳江蘇現辦災務情形以廣

皇仁仰祈

聖鑒事竊照本年夏秋間江淮湖河同時並漲各屬多  
被水災疊奉

諭旨賞給撫卹碾穀平糶並

恩允借動庫項採買米麥免稅通商接濟民食

軫念災區無微不至伏查

臣

等前次報災摺內欽奉

硃批有云悽慘景况不堪設想百姓何辜總由朕之不  
德所致欽此又於趕緊易換錢米隨查隨給句旁欽

奉

硃批所辦甚是務要趕緊拯救均沾實惠或可免委於  
溝壑也欽此臣等跪聆之下感凜交增比卽恭錄欽  
遵轉行知照宣播

皇仁聞者莫不感泣旬月以來人心貼定雖災不擾良  
者安命而莠者畏法斯皆

聖德之所彌布有以淪肌而浹髓也惟是本年災重且  
廣顆粒乏收哀鴻徧野博濟實難現在各處水勢  
雖已落至四五六尺不等尙未全行消退撫卹散  
畢之後須將災分勘定俟百姓田廬涸復始能查

明戶口散給大賑自秋徂冬爲日尙長自應設法接濟臣等體察情形於例賑之外酌擬章程十二條率屬籌辦仰答

宸廑謹陳於後

一倡率勸捐以賑貧乏也查任卹之誼從古所重而勸分一節尤於荒政爲要本年水災旣重臣

等前已出示曉諭勸捐竝卽率同司道府州等查照道光六年成案各捐廉費爲倡現據江寧省城紳耆士商暨僑寓有力之家湊捐銀十餘萬兩鎮江府城聞亦捐至十萬以外其餘各屬



據報或捐銀或捐錢或捐施饘餅米穀或捐銀  
買米平糶至金盡爲止雖確數尙未彙齊大率  
皆能踴躍至鄉村僻遠之區勢難周徧卽以各  
村所捐之貲贍其本村其貧村不敷捐辦者以  
鄰近富村酌爲協濟每處公舉三兩人經理董  
管其捐項仍存於捐者之家官吏皆不經手卽  
鄉董亦第記其捐數與得錢人數爲之調撥使  
其自相授受施者見德受者感情庶安貧卽以  
保富而人心自貼矣

一資送流民以免羈留也查水勢初來汪洋一片

災民無可託足難免逃荒外出其中良莠不一  
如聚集太衆恐致滋生事端現飭隨處稽查予  
以資送先詢明本籍村莊令其回籍待賑如本  
籍無可棲止或別處有親故可依及年力壯強  
願往各處傭趁者現飭地方官酌給錢文派差  
押送下站取回照下站亦照上站遞送總令  
隨到隨行令其勢不使停留滋事俟田廬涸  
出仍資送回復業

一收養老病以免流徙也資送之法旣行強壯者  
自可分遣其中老弱殘疾出旣無力歸又無家

尤堪憐惻亦須分別留養卽以地方之大小酌量人數之多寡擇城外寬敞寺院與之棲止按日發給口糧不准進城滋擾其有男女同行者詢明實係一家准其同住餘悉別居不許混雜仍派員彈壓造冊稽查以憑水退時回籍領賑一勸收幼孩以免遺棄也貧民被災外出口食無資致將幼孩遺棄道旁歷經勸諭富民收養而有力之家多不敢收蓋恐日後仍被本生父母認還撫養徒勞兼虞詐擾夫襁褓待人爲活父母旣不能養而棄之其情已絕收而養之者卽

其父母也撫成之日或作子女或作養媳悉聽其便本生父母日後應不准認還其有好義之家收養棄兒仍情願送還本生父母者地方官倍予嘉獎務俾幼孩多得生路

一勸諭業戶以養佃農也查業戶田產給佃承租佃戶亦藉資食力比之平人較爲親切此時業戶雖亦遭災究屬有力居多現飭勸諭富厚業戶酌借窮佃錢米以度荒歉俟至豐歲償還但不得倚災強借如有陵犯仍按例嚴行懲治其力量無多難以分潤者亦不必強如有能收養

多人或所貸數多而不責償者由地方官酌予獎勵使業佃以恩義相結亦可感召祥和

一殮瘞屍棺以免暴露也查驟漲之下水勢衝急多有棺柩被水漂流且有淹斃屍骸隨流漂溺者現飭沿江各縣及救生等局雇夫撈殮厝其棺柩俟水退有人認實給還如係無主屍棺卽買地厝葬作爲義塚其有好善之人情願捐辦者按其殮瘞多寡分別獎勵

一多設糶廠以平市價也現值市糧昂貴之時除碾動常平倉穀照例減價平糶外前經

奏明籌項卽委員分赴鄰省陸續採買米麥已於河  
南省買得麥三萬石米一萬五千石現飭分撥  
災重各州縣設厰平糶查明實係貧戶酌定升  
斗給票准買以杜市僧影射漁利仍俟採買事  
竣核數歸款竝分勸積穀之家隨力平糶各濟  
本村出糶之戶旣多則市價可期日減矣

一變通煮賑以資熟食也查從來救荒每多煮粥  
然粥厰需費較重今擬兼用糊麵以濟不足一  
厰之中多設鍋竈天明舉火燒水令沸先將白  
麵調以涼水俟湯沸入麵於鍋隨入隨澆卽已

調熟隨煮隨給不稍停留此鍋甫罄而彼鍋又熟矣事省費輕亦以備隆冬煮賑之一法

一捐給絮襖以禦冬寒也災民衣褐不完冬月尤爲難度欲給棉衣自須有面有裏工料不能甚省恐人多而費不敷且窮民得之易於當賣查有一種棉花彈成絮襖兩面用線經網不費布疋亦可禦冬其價旣廉鬻之無利今擬隨捐項之多寡酌量製辦於散賑時見有老病極寒者加給一件亦可免於受凍至典鋪本有年冬讓利之條擬卽飭諭典商凡在今冬贖取棉襖布

衣者讓利一半似於損富有限而濟貧實多

一勸施子種以備種植也查樹藝皆足養人是以穀不熟曰饑菜不熟曰饑凡卉蔬可食之物種類何止千百惟生植必視土所宜如瓢菜產自江寧而蘇揚卽少油菜蔓於沙地而山區卽瘠小民謀生路熟隨宜布種一俟水勢稍落凡可種之地與可食之物皆不待勸而能但恐災民倉猝轉徙所存子種無多此時貲本旣竭購備維艱應卽通飭勸諭有能施給子種者或穀或菜其功同於錢米均可廣布以蕃種植而資速



濟

一禁止燒鍋以裕穀食也查耗穀之具莫如麴蘖  
祇以小民賣酒營趁亦是謀生一端而江省水  
陸交衝貿遷來往一經出示禁酒徒爲胥役訛  
詐之資勢難全禁惟此時災歉已甚粒食維艱  
豈容更滋暴殄除酒自外省載來仍許買賣流  
通及秫糯無多准釀外其本地燒鍋做坊傷損  
食穀最多實爲荒年之害所有稷稻一項應行  
禁止熬燒以裕饑餐

一收牧牛隻以備春耕也貧民遇災口食尙且難

顧雖有耕牛無力喂養往往鬻於私宰之人得錢過度目前既嗟殄物日後又嘆輟耕深堪憫惜今擬於捐項中酌提經費設局收養凡貧民以耕牛赴質者量給當錢暫爲收養仍給以當票並鋸下角尖俾其收執以俟贖時比對此係道光三年蘇省行之有效者現在亦擬照辦庶愛物卽所以仁民矣

以上十二條經<sub>臣</sub>等與藩司林則徐梁章鉅巡道葆謙等籌商核定飭屬舉行並將章程鈔發照辦間有情形不同之處亦聽其參酌而行冀無窒礙

刻下各屬均在勸捐果能多多益善則經費得以  
有資全活自必不少將來事竣容<sub>臣</sub>等覈明捐數  
分別

奏請獎勵仍隨時督率妥辦總期人皆得濟費不虛  
糜以仰副

聖主懷保惠鮮之至意所有<sub>臣</sub>等籌辦災務情形謹縷  
晰具

奏伏乞

皇上聖鑒謹

奏

道光十一年九月二十二日奉到

硃批所奏十二條大旨俱已詳備覽奏朕心稍慰務須  
實力實心詳慎擇人辦理被災百姓苟能免溝壑之  
患汝等可謂盡心盡職亦稍贖朕之闕失矣勉益加  
勉欽此

體察賑務情形摺子

奏爲遵

旨體察賑務情形酌量辦理仰祈

聖鑒事本月初七日承准軍機大臣字寄道光十一年  
八月二十九日奉

上諭御史裴元俊奏敬陳賑務積弊摺內稱辦賑以戶  
口冊籍爲憑而戶口尤須挨查得實請令州縣於城  
鄉紳士中擇其素行公正爲衆所推服者率同里保  
認真挨查出具甘結造冊存案州縣再親身逐細查  
覈俟該管知府覆勘後卽由府分寫榜文載清戶口

註明應給銀錢數目卽飭所委城鄉紳士分領張貼  
令民共知共見又州縣於藩庫領賑時每有因應解  
之項未解藩司卽在正項內先爲扣抵令該州縣將  
應解之項備銀施放該州縣無非尅扣賑銀刪減戶  
口以爲彌縫侵蝕地步縱有能備銀足款者亦不過  
那此虧彼請飭下各該撫等行知藩司於州縣領解  
之項另行催追至賑卹帑銀務須按數實發不得任  
意扣抵又里保書吏視辦賑爲利藪給票則有票錢  
造冊則有冊費災民無力出錢卽刪減戶口任意誇  
張查辦理賑務一切文移冊籍及支棚搭厰馱運錢

米等費俱係官爲給發豈得任聽胥役向災民勒索此等弊端務須責成印委各官嚴行禁束加意密察一有見聞立即嚴拏懲辦仍令該管府道不時輕騎減從隨時查察如州縣有故縱一切等情卽據實嚴參等語本年江蘇等省均有水災該御史所奏賑務積弊實難保其必無著各該督撫各於所屬體察情形將所奏各條查明是否可行酌量辦理將此各諭令知之欽此遵查散放災賑原以戶口爲憑戶口紛

繁必須遴委多員協同該管州縣認真確查方能

妥速

臣

等現已參考成案採訪輿情督同司道等

議定查賑章程責令委員等挨戶清查按照被災輕重分別極貧次貧驗明大小口數當面登冊填給賑票不許假手地保書役查完一戶卽於災民門首壁上用灰粉大書極貧次貧某人大幾口小幾口字樣查完一處卽行結總併將總散各數繕寫草榜粘貼村口使災民一目了然如有詭戶及舛錯之處許卽舉發更正隨後繕發大榜由道府親往抽查倘復稍有混冒立卽嚴參究懲此條最爲扼要

臣陶澍前於道光六年十二月奏奉  
諭旨遵行現在臣等復加參酌并將章程咨明



欽差

臣

朱士彥白鎔查照在案惟是事關賑務不厭周

詳若如該御史所奏能於城鄉紳士擇其素行公正爲衆所推服者率同里保逐細挨查於賑務自更有益然此次被災州縣應賑者已有十八九處每一州縣不下百十村莊旣未必每村皆有紳士縱有一二紳士亦未必卽係公正爲衆所推服之人若不拘人地而令此村之公正紳士挨查彼村之戶口卽恐未必盡識而責以具結造冊則事有所難兼以鄰里之中非親卽友希冀厚賑者多一經核實則舐望頓形在自好之紳士或不肯出而

任其勞怨而不爲衆推之紳士或轉欲干預賑務以自遂其私則訐控且從此而起臣等悉心籌酌大賑與捐賑有別捐賑出自鄉鄰易於見惠故紳士樂於從事大賑則事體繁重責任較嚴似只可循照舊章量爲變通如果紳士中有品行素端而又肯急公任事者卽由各州縣邀令幫同委員詳細確查如不得其人卽無庸濫取充數以杜流弊而免格礙又該御史奏稱州縣於藩庫領賑時藩司務須按數實發不得扣抵該州縣應解之項一節遵查此次災務臣等早經諭令藩司將賑銀按

數實發復經該藩司稟稱辦災之州縣赴省領銀  
恐被司書索取使費擬將發給賑銀委員逕解州  
縣或發府州轉給該司發銀時必親身查看按庫  
平庫色兌足封貼印花如解到州縣驗有絲毫短  
少銀色低潮許承領之員稟請根究另行兌換給  
發司書如有索取釐頭者立即指稟以憑嚴究等  
因劄行各府州縣遵照在案是該藩司於賑卹銀  
兩辦理甚屬認真斷不至有扣抵別項之事至里  
保書吏視辦賑爲利藪往往互相勾結於委員一  
到時捏報詭戶多開饑口按籍有名覈實無人委

員受其朦混則賑銀入其私橐倘被委員看出破綻必欲詳查則又勾出土豪地棍號召愚民暗使婦女成羣結隊攔舟圍轎使其不能細查而後已且委員夫轎船隻及隨行書役所有例銷盤費不敷或責令里保供應則里保之暗地取資有所藉口而委員亦竟無可如何更有劣衿刁民窺見吏胥侵蝕亦遂從中挾制或於木戶之下多開數戶或將外出之戶頂名冒領種種弊竇不止票費冊費已也欲除其弊必清其源臣等現在督飭藩司選擇結實可靠之員委令承辦其跟查之書役里

保一體厚給工食使之有力當差不得藉詞賠墊  
致開需索地步而又寬其查賑之限使山僻寫遠  
村莊皆得陸續挨查不至迫於時日致滋草率遺  
漏如吏胥中有增減戶口需索票冊各費及村民  
中有爭論極次阻撓滋擾者委員解赴印官衙門  
立即責懲枷示俾皆知所嚴憚不敢相率效尤致  
滋冒濫臣等仍一面另委委員隨時密查一面通  
飭各屬激發天良將一切積弊概行革除務期  
帑不虛糜民沾實惠以副我

皇上軫念災區之至意所有臣等體察地方情形及現

在辦理緣由理合恭摺具

奏伏乞

皇上聖鑒謹

奏

道光十一年十月二十九日奉到

硃批覽奏均悉實力妥辦欽此又於自好之紳士或不肯出而任其勞怨而不爲衆推之紳士或轉欲干預以自遂其私等句旁奉

硃批甚是又於紳士如不得其人卽無庸濫取充數以杜流弊而免格礙等句旁奉

殊批是欽此

陶文毅公全集卷十目錄

奏疏 沙洲

請將新漲沙洲歸公杜訟摺子

酌辦沙洲歸公章程摺子

覆奏江蘇尙無阻礙水道沙洲摺子



奏疏 沙洲

請將新漲沙洲歸公杜訟摺子

奏爲遵

旨確查新漲沙洲酌議入官充公以杜爭競恭摺覆

奏仰祈

聖鑒事竊 臣 承准軍機大臣字寄欽奉

上諭御史蔣泰階奏通州崇明一帶沙地偶然漲出多  
爲土豪霸占近因爭地釀訟案紛起請飭各州縣  
勘明此等沙灘無庸紛紛查辦等語此項沙地坍漲  
靡常沙棍乘機霸占恃強逞兇屢釀巨案最爲該省

惡習著陶澍體察該處情形應如何息爭杜訟之處  
據實奏聞欽此當卽恭錄轉行查議並因沿江沿海  
各屬皆有沙洲自應通查明確一併

奏辦又經專札飭查去後茲據各屬陸續覆齊由江

寧蘇州兩藩司具詳前來

臣

查江南沙洲地畝價

少課輕獲利甚厚是以一沙初漲羣起相爭每釀

械鬪巨案前於嘉慶十七年間經前督

臣

百齡等

奏准將坍沒之地不願豁除者報案留糧遇有新漲

子母相連准其按數撥補如係江心突漲概行由

官召變分別繳償先後以定准駁本爲杜爭起見

乃法之所在弊卽叢生臣詳加體察現惟崇明一縣有沙無田歲徵沙課向有常額漲旣不陞坍亦不豁統歸三年大丈於原額課內攤增攤減由來已久祇須於屆丈之年從公攤撥尙不難於杜覈外其餘有洲各屬則皆積慣沙棍恃有留糧待補或因該洲將漲卽先捏報被坍預爲冒陞地步或向被坍之戶私買坍糧爲爭訟地步一遇新漲沙洲卽糾誘散戶以得地均分斂錢興訟非以甲地之相連捏爲乙地之接漲卽以此號之舊額指爲彼號之復生分投具呈各報各案其無可影射者

則又以突漲爭買沙未出水卽已望影報陞百計  
壽張紛岐錯出甚至恃強爭鬪動輒傷斃多人積  
釁成讐愈難解釋而棍蠹慾壑無窮猶且多方唆  
弄或抗不具結或已結復翻或捏情京控案一日  
不能結彼仍獲一日斂錢之利而小民貲本已空  
欲罷不能未獲沙地之利轉受沙地之累此則沙  
棍爲害而自留糧待撥又因法致弊之實在情形  
也竊思截流必先清源源之不清雖力截其流而  
不止民之趨利如水就下而狡黠沙棍則更變幻  
多端卽再別設科條恐一法立而一弊又生仍屬

有名無實伏查丹徒縣之樂生洲自入官收租作  
爲歲挑徙陽運河之費迄今數十年官佃相安此  
外沿江沿海控爭沙地一經歸公訟端卽息推原  
其故地旣歸公豪強無可覬覦而窮民奉官承種  
無所用其機謀卽亦不爲洲棍所惑則欲求永息  
爭端莫如遇有新洲漲生一概歸公爲善若謂自  
然之利應以利民則今之沙洲不但窮苦編氓斷  
不能得卽稍有力之善良一被勾誘輒至傾家若  
復因奪而鬪身命且多不保是徒有利於棍蠹而  
實無益於良民則以之充公正所以息爭安良且

洲仍民田並非與民爭利而受佃於官與受佃於  
豪強其租息之輕重亦殊於窮苦編氓更爲得濟  
況地方遇有例外應辦之事恒以費無所出每致  
束手大江南北地廣政繁應辦事宜更復不少舉  
其大者言之夫東南爲財賦所出全賴水利爲功  
現在各屬河道湮塞旱澇無備一遇災歉公私傷  
損上年雖將吳淞江

奏請疏濬而瀏河白茆孟瀆諸鉅流尙以經費難籌  
致稽挑辦卽徒陽運河亦多賠累如練湖等處卽  
未能修治若淮揚所屬河道固應河工鹽務修理

間亦有須地方籌辦者徐海兩屬並有東省豫省  
下注之水一遇雨澤稍多輒成澇歉實屬目前至  
急之務

國家經費有常旣未便頻頻請

帑若責之州縣又力有難能任其湮廢則民困而賦  
稅亦無所出今幸有此自然漲出之沙地如以之  
撥充公用作爲水利津貼縱不能大舉一修亦可  
以擇要辦理逐漸成功旣無損於

國計實有利於民生堪以一舉兩得臣悉心酌議應  
請將崇明一縣仍循其舊外其餘各屬嗣後凡有

坍沒沙洲均令地方官隨時勘明實在被坍頃畝  
卽將課賦詳咨豁除不准留糧待撥如有新漲洲  
地無論子母相生江心突漲一概歸公責成洲總  
隨時呈報由官勘明按則詳定課賦其洲地卽召  
佃承種歲收租息按數批解藩庫除扣完課賦外  
餘爲地方水利之用遇有應辦由藩司確勘地方  
緩急情形詳明酌放辦理至民間買洲例應繳價  
泥草等灘每畝價止一二錢卽高阜堪以圍田之  
洲價亦不過二兩爲數甚微今旣入官若令佃戶  
繳錢作價或又視同已業設有承種不妥礙難退



佃竊以地既歸公卽屬官產應請免繳例價而租  
既留充公用地仍完納

國課所益尤多如蒙

俞允現在訐訟未結各案卽照此一例歸公無庸紛紛  
查辦所有從前報坍留糧待撥已經咨准部覆尙  
未撥補之案各業戶既經賠課有年仍飭各屬俟  
有新漲洲地果係原坍處所相連俟出水後照案  
詳請撥補以示格外體卹倘有狡執卽將洲地歸  
公所賠之課照數發還由洲地租內分年取息彌  
補俾免輾轉至此項新漲歸公洲地其頃畝陞坍

數目均照民洲之例歸於大文案內造報其應納  
課銀亦歸每年奏銷案內造報所有常年收支租  
息數目隨時酌量辦公不能一例應請免其報銷  
仍由藩司確查彙報督撫衙門查核備案以昭核  
實所有遵

旨查議新漲洲地歸公杜訟緣由是否有當理合恭摺  
覆

奏伏乞

皇上聖鑒訓示謹

奏

道光八年十月初四日奉到

硃批該部議奏欽此

酌辦沙洲歸公章程摺子

奏爲新漲沙洲歸公酌議辦理章程仰祈

聖鑒事竊照江蘇省沿江沿海沙地坍塌漲靡常每因爭

占釀毀訟鬭紛起最爲惡習欽奉

諭旨查辦經臣體察情形據實覆

奏請將此項新漲沙洲召佃收租撥充公用作爲地方水利津貼接准部覆嗣後遇有接漲突漲沙地卽飭查勘入官隨時定課議租專案咨部如有轉則陞科之處亦令照例隨時勘辦查報統於大丈案內彙題應納課銀歸入奏銷造報此項租息旣

經歸公動用應令每年造一管收除在四柱清冊  
備查至從前報冊各戶既准留糧在先如有相連  
接漲准其撥補仍令查明戶口畝數彙造簡明冊  
送部備核等因行司通飭遵照並令將應辦事宜  
籌議詳辦去後茲據江寧藩司賀長齡蘇州藩司  
梁章鉅會議江蘇各屬沙洲於未經

奏定新例之前民間具呈投買或已經繳價尙未造  
具冊結咨部或輾轉駁查未經定案或雖經投買  
尙未繳價若仍准其承買則紛紛查辦弊竇滋多  
自應查明例前報部有案者准其承買執業其餘

投買雖在例前而未經報部及例後詳報各案無論會否繳價均應查照新例將沙地歸公分案退還價值以清界限而免混淆其中有書院善堂等請買沙洲作爲公產雖與民間私業不同如例前未經定案卽不便辦理兩歧亦應發還原價聽各紳士另行置產并此後遇有新漲均不得依託名目濫請撥給以致歸公沙地無多不敷津貼動用於地方水利仍無實濟至各屬沙地有漕田蘆洲之分漕田銀米竝納於每年地丁奏銷入額蘆洲僅完課銀於蘆課奏銷入額并於五年大丈案內

彙

題此次奏定歸公仍入五年大丈係專指蘆洲而言  
漕田在腹地居多本較蘆洲爲少應完糧賦亦倍  
於蘆洲課重利輕爭端卽少原與蘆洲迥異仍循  
舊例辦理不在歸公之列等情詳請具

奏前來臣覆查無異竝將所議另佃收租陞科造冊  
各事宜逐細籌酌臚列條款敬呈

御覽

一已坍未報之案應令各州縣查明豁糧也查留  
糧待補之例業已停止其例前達部覆准留糧

之案新例原准撥補自無庸議惟各廳州縣辦理留糧間有自行註冊或雖詳報而輾轉駁查未經詳咨達部者此時既不便補請留糧自當勘明請豁卽業經咨部留糧各案如所留之糧節年拖欠不完是徒有留糧之名而無留糧之實應將賦額豁除免追積欠註銷待補之案以杜刁巧至各屬舊有公地除河營鹽場各照舊章辦理外其書院善堂學租及旂丁濟運武營調劑兵丁并緝捕經費等項舊有撥買蘆洲歷久藉爲恒產以充公用如坍沒之後一概不准



撥補則經費難免有缺應查明前項沙洲原業  
各有若干頃畝造具清冊咨部存案以此次查  
辦爲定額嗣後如有額內坍缺准其循照舊例  
俟原坍界內與現業地畝緊相連接之處漲有  
新灘按數撥補仍先將坍糧豁除俟撥補之後  
另行陞科以免賠累其寺院公產向係官爲經  
理者亦照此辦理其餘一切私業不得援以爲  
例

一租額應分別定數一律徵收折色也查歸公灘  
地墾種啟科之後卽應徵租若按其所得花息

派撥員役臨洲分收不特薪水多一開銷卽收  
貯亦多折耗且運送變價輾轉過手易於中飽  
自應概收折色惟地畝腴瘠不同各處情形互  
異所有應收租息若憑空酌斷無以示平允彼  
此紛岐又無以昭核實查蘆課全書所定課銀  
輕重卽視地之肥磽以爲等則今酌中定議應  
請照課銀之數加七起租如上田課銀每畝九  
分一釐者加銀六錢三分七釐共應徵租銀七  
錢二分八釐分作八成以一成銀九分一釐完  
課以六成銀五錢四分六釐解司尙餘一成銀

九分一釐作爲一切公費其餘各照科則重輕  
分別增減由各廳州縣設立三聯版串填明佃  
戶姓名徵租銀數於每年十一月初一日啟徵  
先期飭令洲保催輸令各個自行交納現銀儘  
徵儘解統限於次年五月底全完如有未完照  
雜項錢糧例核計處分倘有侵蝕卽照虧缺  
帑項例嚴行參辦

一陞科地畝應俟生有蘆草再行起科也查蘆課  
全書有水影光灘泥灘等項名目均無租息可  
收嗣後歸公洲地應俟生有蘆草再行陞科起

租完課所有應完課銀卽由該地方官於租息內劃款批解至遇災蠲緩遇坍報豁仍與民洲一律辦理

一報部清冊應查照部議於年終造冊開列四柱總數報部無庸隨時逐案詳咨以歸簡易也查沙洲租息係

奏明爲擇要興修水利津貼以地方自然之利充地方必需之用實屬以公濟公遇有應辦水利由藩司確勘地方緩急情形詳明督撫酌核動放歲終仍由藩司將一年收支數目彙報督撫備

核層層稽察自無弊混至動用工費之際時價  
間有低昂未能畫一非年例興修可比卽不能  
悉依例價造報應請每年由兩藩司各開管收  
除在四柱總數冊詳咨報部其工程細數無庸  
再行開造亦無庸逐案詳咨以免輾轉駁查登  
覆之繁而省案牘

以上各條經臣逐加酌核均屬切要此外尙有應  
行由外查辦事宜亦經飭令藩司議定章程通詳  
立案并飭各州縣實力遵辦以資經久所有新漲  
沙洲歸公酌辦章程謹會同大學士兩江總督臣

蔣攸銘恭摺會

奏伏乞

皇上聖鑒訓示遵行謹

奏

道光九年九月初七日奉到

硃批依議戶部知道欽此

覆奏江蘇尙無阻礙水道沙洲摺子

奏爲查勘江寧蘇州各屬沙洲尙無阻礙水道竝酌  
議查禁緣由恭摺覆

奏仰祈

聖鑒事竊前欽奉

上諭據給事中邵正笏奏江湖漲灘占墾日甚請飭查  
酌辦以弭水患而衛民生一摺本年江蘇安徽江西  
湖廣等省水漫成災如果平日講求水利江湖通暢  
何至釀成水患積久未消如該給事中所稱近年長  
江一帶沙洲日增多被居民占墾以致阻遏水道且

地方官所報陞科者不過十之二三而豪強之兼并  
奸蠹之侵蝕者不知凡幾自應將積弊悉除以收實  
效著陶澍等各飭所屬於瀕臨江湖地方詳細履勘  
如有沙洲地畝實在無礙水道者方准居民認墾毋  
得任令豪強勾通奸蠹霸占以多報少而無力貧民  
轉致向隅仍無裨益其有壅遏水道之處必當設法  
查禁使漲水得資宣洩則害除而利興該督撫等當  
認真妥辦固不可以空言塞責亦不可任令地方官  
假手吏胥乘機舞弊以致利不能興害不能除百姓  
轉受其騷擾殊失弭患衛民之意著將該給事中原



摺鈔寄該督撫等閱看酌議具奏欽此當經剗飭藩  
司欽遵遴委妥員履勘籌辦去後臣伏查兩江地  
方設省以江爲名江水自四川至湖北境內南會  
洞庭北會漢沔而來至江西又南納鄱湖之水至  
安徽又北納巢湖之水奔騰浩瀚經江揚鎮常通  
太各境以入海誠如該給事中所云天下之大利  
所在也而江蘇各境又南有吳淞婁泖之三江北  
有黃淮沂泗之四水皆與江水各別而各由江蘇  
境以入海故言水利於東南尤爲第一大端黃淮  
爲漕運所經沂泗以濟中運特歸河臣管理吳淞

於蘇松各郡農田最關緊要經

臣

於巡撫任內設

法籌濬數年以來水旱藉資洩蓄餘如常州之孟

瀆鎮江之練湖以及白泖婁江並經

臣

籌度多年

或因籌款而未舉或已舉而尙未蒧事仍當次第

辦理至於長江一帶沙渚縱橫淤成洲地沿海沿

河俱皆有之總因江南地方近海衆水所趨故洲

灘尤多也其間有年久陞科者有甫經陞科尙未

成熟者並有洲未成而望影陞科有洲已坍而留

糧待補者爭長競短控訟無休不特阻礙水道抑

且把持械鬪屢釀重案實爲洲棍惡習

臣

於道光

八年九月內曾經另議章程詳悉

奏明除崇明一縣四面環海有沙無田課額仍循其  
舊此外各屬凡遇沙洲坍沒均令地方官隨時勘  
明詳咨豁賦不准留糧待補如有新漲洲地無論  
子母相生江心突漲一概歸官勘明定額招佃納  
租解司充課以餘息爲地方水利津貼經部議覆  
奉

旨依議欽此嗣是械鬪爭洲之風頓息而洲旣歸官亦  
不致私墾礙公至上年水災之重實因自夏徂秋  
苦雨連綿各省同時水發江省地處下游兼以湖

河並漲宣洩不及非由江洲壅遏且江洲之生亦實因上游川陝滇黔等省開墾太多無業游民到處伐山刊木種植雜糧一遇暴雨土石隨流而下以致停淤接漲此等謀食窮民旣難禁其生計而開墾旣多傾卸愈甚及至沙漲爲洲則除去更難尋常一渠一壩動輒需費萬計況於長江數千里何從施工出土更何從籌此鉅款以爲經費是該給事中摺內所稱挑挖漲沙刨除塘壩以爲逐漸施工地步者似可不必以免滋擾惟私種蘆葦一節及豪強霸占等情難保非事理所有自應逐細

確勘嚴禁以期水道無阻茲據江寧蘇州兩藩司  
委員會同州廳縣場各員勘明各屬濱江臨湖傍  
河沿海凡有沙洲地方其已經成熟者均係按則  
完課並無私占自道光八年以後新漲沙洲循照  
奏定章程分別歸公佃租多係種植菜麥棉花等物  
其產植蘆葦之洲甚少應隨時剷除禁種此時實  
無阻遏水道之處且沙洲旣已歸公豪強蠹猾亦  
難侵隱是以勾串霸墾之弊亦除惟疏通水利攸  
關弭患衛民誠恐日久懈生或致奸民私行圍築  
不可不防其漸臣與撫臣現復劄飭各地方官嗣

後每年於冬令水涸之時親詣濱臨江海河湖處  
所周歷查看一次如有新漲無礙水道者方准遵  
照新例歸公招佃陞科有礙水道者卽行督令刨  
除淨盡以順水性具結送司呈送備查倘有沙地  
阻礙水道及隱匿占種情弊一經查出卽將占種  
之人嚴行治罪並將地方官據實查參如此則牟  
利奸徒知所畏忌而地方有司亦知自顧考成以  
期水利民生兩有裨益除江西安徽兩省洲地情  
形已由各撫臣議覆外所有江寧蘇州各屬沙地  
無礙水道暨酌議查辦緣由謹會同江蘇巡撫臣

林則徐合詞恭摺覆

奏伏乞

皇上聖鑒訓示謹

奏

道光十二年十一月二十八日奉到

硃批另有旨欽此同日奉到道光十二年十一月十七

日內閣奉

上諭前據給事中邵正笏奏江湖漲灘占墾日甚請飭查辦當降旨令該督等酌議具奏茲據陶澍等勘明各屬沙洲情形酌議覆奏疏通水利攸關弭患衛民

江蘇各屬沙洲地方自道光八年經該省奏定章程  
後新漲沙洲均已分別歸公佃租及隨時剷除禁種  
既無阻遏水道之處亦無侵隱霸墾之弊惟日久懈  
生或致奸民私行圍築不可不防其漸該督撫等卽  
嚴飭各地方官嗣後每年於冬令水涸之時親詣濱  
臨江海河湖處所周歷查看如有新漲無礙水道者  
方准照例歸公召佃陞科其有礙水道者概行督令  
剷除淨盡並勒令具結送司轉呈備查倘查有沙地  
阻礙水道及隱匿占種情弊除將占種之人嚴行治  
罪外並將該地方官據實查參毋稍寬縱總期有司



實力奉行奸徒知所畏忌庶於水利民生兩有裨益

欽此